

Derçûn ji desthelata manayê



Hoşeng Şêx Mihemed

Geryan li mirovî

Muhsin Qoçan

"Befra li vêrê" yekem berhema Muhsin Qoçanî ye ku wek pertûk çap kiriye, li sala 1986-ê hatiye çapkirin. Diyare di wî mawey de sereta ê bû ku di navbera yar û welatî de bigere û destpêkek bû ku mirov wek aşiq û meşuq wek yar, bihête naskirin.

Ji ber vê çendê jî dibînîn Muhsin Qoçanî ev pertûke kiriye diyarî bo (yara xwe welatê xwe). Diyare helbestên vê dîwanê, vala nînin ji binemayên siyasî û nîştimanî, lê dibînîn (sozdarî jî) di wan



helbestan de dibe binemayek bi hêz, aneku di vê derê de sozdari, sozdariya mirovî bo mirovî, dibe binemayek nû di helbesta deverê de, renga ev çende berî Muhsin Qoçanî li cem helbestvanên di jî hebe. Lê ne ku wek binemayek bi hêz, çendîn helbest di vî dîwanî de dişên bikine nimune bo vê sozdariyê û peywendiya nû beramber mirovî di helbesta deverê de, welat û yar, her dû pêk ve wek dû çemkên xwedan bihayên mirovayetî û nîştimanî verêja hizra Muhsin Qoçanîne di wî demî de û renga ez şaş jî nevim heger bibêjim sîstema hiziriya Qoçanî her di vî dîwanî de heta *“ew xewna li ser fîstanê wê bûm zava”* heman sîstem û serederîkirine digel herdû babetên nîştimanî û sozdariyê, di pertûka navbirî ku li sala 2001-ê hatiye çapkirin dibêje:

“Bo milletê min, yara min, welatê min û ew dewleta hêsta nebû ev hozane diyarîne”

Aneku (diyarî) verêja heman sîstemê hizirî û dîtiniye, bi baweriya min di helbestan jî de, dîsan herdû tewerên nîştimanî û sozdari dúbare dibine ve, carina (dewlet) dibe ruha rehaya nîştimanî û carina eşq jî dibe ew êtîna di nav xwîna Mihsnî de bişkiftî û natemire. Renga Muhsin ji layê şêwazî û zimanî guhurîn û pêşdaçûn dîtibe, lê ji layê desthelata mana û helbest wek verêjek bo sîstema hizirî, guhurînên mezin û diyar bi xwe nedîtîne, helbestên Qoçanî, manayên diyar û aşkira yên xwe hene, Muhsin Qoçan di hozana *“Sivik were”* ku li *“Befra li vêrê”* belav bûye dibêje:

*“Ho periyê.
Cêmka çavêt hêvî yê
barê xemêt xwe tu dane
Sivik were.
Sîngê min bo te zozane..
Têr lê bigere
Lêvêt min ji te re çerwane.”*

Û li sala 1999-ê Qoçan dibêje:

*“Li van nêzîka
Min li bere
Diyariyekê bo te bînim
Ji bişava bajêrvanî yê*

*Ji keşeperên belatîna
 Ji yarîkên gul û xunava
 Qafkekê ciwan
 Weku semfoniya keniya te
 Lê li cih gulê
 Dê çavên xwe têdaçînim"*

Û dîsan Muhsin di helbesteka dî ya li sala 2003-yê de dibêje:

"Bibe gezo û bi lêvên min de were xarê"

Ev nimûne min gelek bi lez di nav sê pertûkên Qoçanî hînane der ku jiyê wan di navbera salên 1986 û 2003-yê de ye, em bi sanehî hest pê dikin, ku her sê verêjê heman sîstemên hizirîne û tinê pêşdaçûn ji layê zimanî ve hatiye rûdan, heger na, wate heman amajên wekhev didine me.

Min divê bibêjim, helbestên Qoçanî ku helbestên baş in û Muhsin wek helbestvan şiyaye berdewam binivîse û berhemên xwe çap bike, lê li ser yek binema asê maye û heta niho jî bi heman sîstem helbestên xwe yên kevin nû dike ve, aneku pirosa nivîsînê li dev Muhsinî helbestek berdewame. Lê bi nefesek kurt, heger na, ez bawerim bi karê montajkirin û têkhelkêşana dîwanên wî yên mişê em dişên helbestên dirêj û xwedan henaseka nevebir jê çêkin.

Û renga di dawîya helbestên Qoçanî ku *"Xidiro"* bû li 2005-ê hatiye nivîsîn û li kovara Peyv hijmar 32 hatiye belavkirin, verêja heman sîstema siyasî ye.

Lê renga ta radekî bişê wek mirovdostek, xwe bidet niyasîn û rexne li desthelata aqilmendên kurdan bigirît, û cîhanbîniyekê bo dîn û duniya û dînatî û siyasî û desthelatê pêşber bike, lê dîsan jî helbest nigûye, dimana û amajên diyar û aşikira ku delîfê nadet me, em têda bi desthelatên xweyên zimanî û xwandinê bigeryên, renga ew sîstem heman sîstema salên heftiyan be, demê helbest çekek bû didestê mirovîda da di jî desthelata dîkitoran rawesitît, û vêgavê jî nêzîke heman tişt lîdef Muhsinî û komeka helbestvanên deverê û kurdan dúbare bibe, ew jî ji ber egera guhurînen siyasî ku piştî serhildanê bi şerên xweku jî dest pêkir û paşî jî şerê azadiya êeraqê û xewna dewletbûn û serxwebûnê ji êeraqê li cem me.

Diyar e ew rûdawên siyasyên mezin, karîgeryê li helbestê diken, lê wekî ez têbînî dikem heçeku, wan helbestvanan divêt careka dî li cemawerî bizifirin, piştî ku mawekê gaziya hozana nû û nûxwazyê

dikiran.

Selman Kovilî:

Mamê rehmêtî Selman Kovlî, ku li cem min cihek taybet heye, dîsa ew jî yek ji wan dengaye ku digel Qoçanî şiyayene karîgeriyê di helbesta nû de bikin û wek gazîkerek nûxwaz hatiye nîyasîn, renga baş be heger em berperê dawiyê ji dîwana wî *“Cîhana guha”* bixwînin demê dibêje:

“Silav li qelemên xweragir, li helbestvanên kepî bilind, ewê ji berî û piştî serhildanê stirî û di çavên dijmin û neheza re, di çavên birakuj û deholqutên birakujiyê û dûberekîyê re. Ji wan re û bo hemû dilsoz û wefadar û xwedan helwîsta ev dîwane diyarî ye.”


Renge di vî diyariyê de em verêja hizra mamosta Selman Kovilî bigehîn ku sîstemek nîştimanperwerî û kurdperwerî ye.

Diyare *“Werine vînê”* gaziyek diyar û aşkiraye, bo ku mirov bihê vînê û jînê û diyare jî helwîst û wefa û dilsozî jî dîsan ew babetin ewên Mamê Selman gaziyan bo dike û helbestên wî tijî wan raman û amajanin.

Çi dîwana *“Cîhana guhan”* û ji *“Demê çargoşe”* herdû berhem tijî wateyên siyasî, civakî û kurdayetîne:

*“Sosyalîzm
Ev baxê gulane
Ezê di nav de
Tu yê ji dûr ve dibînî
Ez û gul himbêzîn
Tu yê di xewnên xwe de
diçîmî
Tu alozî
Welê ez dê li çi alozim
Komonîstim
Û bi jî sosyalîzm.”*

Eve yeke ji helbestên mamosta Selman Kovlî ku li sala 1997-ê hatiye nivêsin, ku tê de helbest nêzîkî



dirûşman bûye.

Her wesa di piraniya helbestên rehmetî Selman Kovlî, em bersivên yeqînî dibînîn, bo nimûne dibêje:

*“Were di vî jûra tarî ve
Li nav kel û pela bigeryê
Li min bigeryê”*

Diyare em dişên pitir ji ravekî bo wan peyvên serî bikin, bo nimune bibêjin, merema Selman Kovilî ewe bibêje mirov jî weku kelupelan lêhatî, aneku mirov jî bûye kelupel û dihê kirîn û firotin, yan mirov ji mirovayetî vala bûye û çî bihayên remzî û ruhî nemayine û bi tinê bihayeka madî ye, wek her kelupelek din, û dîsan dişên gelek ravan bidine tariyatîyê û her wesa daxwaza lêgeryanê jî bikine babetek felsefî, yan mirovayetî, yan siyasî, yan civakî.

Lê eve hemû di dumahiyê de dibine bersivên yeqînî bo pirsên Mamê Selman Kovilî. Dîsan ez dibînim di helbestên Mamê Selman jî de ziman sadeye û helbest sadene û mirov bi sanehî têdigehe. Aneku heger me pîrsek jî hebe, eve Mamê Selman bersivêkî dide me. Nihênîyên xwe keşif dike û sihirên xwe vala dike, mereqan nahêle di dilê me de.

Dîsan di navbera ezmûnên Mamê Selman bi taybetî *“Cîhana guhan”* û *“Demê çargoşe”*, cewaziyên mezin nînin û em neşên herdû berheman wek dû berhemên cuda bixwînin. Belkî pitir timamkera hevdûne û renga heman şêwe, reng û deng û henasen. Min nevé bibêjim Mamê Selman dengekê tureye, yan rengêkê tox yan wêneyê şorşgêrekê siyasî, yan civakî heye. Heger çî dişên wan raveyan di helbestên wî de bi sanehî destnîşan bikin, çunke demê em destnîşan bikin bi ankoya vê çendê dihê ku me ew mana destnîşan kir ewa verêjên sîstema hiziriya Mamê min Selman Kovilî ye.

Renga Mamê Selman yek ji wan helbestvanan be ku remiz û hêma bi zîrekî û ciwanî di helbestên xwe de bikarhînbîn, û renga gehîştibine rada huneriyê, aneku bikarhînana remzan li cem Mamê Selman heman erkê rimzên Bedirxan Sindî û yan Muweyed Teybî, yan helbestvanên heftiyên û heştîyan bi cih nahîne, renga yên wan rimuzên neçariyê bin, ku zerureta barê siyasî û rewşa civakî xwastibe. Lê ya Mamê Selman karek hunerî bin, lê digel vê çendê jî demê em wan remzan rave dikin, dîsan dê tûşî heman arîşa desthelatên mana û erkên siyasî û civakiya helbestê bin.

Divêreda bo bîrhanîn başe bibêjim: Heger despêk mirov li cem

klasîkiyan remiz bû bo xwedê paşî li cem nivîserên şêstan û heftiyan û heştîyan remiz bû bo welat û nîştmanî, û paşî lîsalên heştîyan pîç pîçe û nohetan digel hindêk dengên wek Muhsin Qoçan û Xazî Akreyî û yê din bûye rimzên sozdariya mirovan û digel hev di kiryara eşqê de, û li cem Mamê Selmanî û paşî dêbînîn li cem helbestvanên di jî mirov dibe remiz bo dû babetan yekem desthelat û duwem bê desthelat, aneku mirovên xwedan desthelat, axa û beg û karbidestên piştî serhildanê û benî û gundî û mîllet û xwedanên şehîd û karesatan, bi taybetî di berhemên piştî serhildanê û şerê nafixweyî.

Ku Mamê Selman Kovlî jî yek bû ji wan helbestvanan ku ev milmilane di çendîn berhemên de diyar kirîne:

“Her çil sala,
 Xidir têt û dibe mêvan
 Spêde em tûla berdidinê û
 Raditeqînîn..
 Paş çil sala têt bîra me
 Ji nû bo digirîn
 Ji nû çîroka wî vedigêrîn
 Şefbêryêt xwe pê diqedînîn
 Her careka hatî û revî
 Gotineka wî ya deng veday
 Kurd xayîno..
 Her şeveka çîroka wî
 me vegêray..
 Me ya gotî Kurd xayîno
 Her şivanê marî gestî
 Ya qêrkirî Kurd xayîno

Kurd xayîno, eve wêneya giştîya mirovê kurd e ku di barekê siyasî, civakî û mêjûyî de dibe xayîn û xwefiroş û şerker sera desthelat û deskeftên madî.

Diyar e hewlên Mamê Selman ew bû ku helbest bibe rêgirek li ber dem şer û xwekuştina mirovê kurd bi destê kurdan, aneku helbest bişê rastewxwe bibe ziman û dengê dijî şer û venabûnê û manayeka jiyandostiyê di nav bizava siyasî û civakî û mêjûyî de xeliq bike, bi vê çendê jî helbest tijî siyaset û mêjû û civak bû.